


# NA NGÁMBO YA RIDÓ NA NTANGO

 Nalingi koyebisa awa ete mabondeli na bino ezuaki biyano: ezali mayangani lokola oyo tozalaki na yango ntango nabandaki liboso na lotómo, eleki mibu ebele. Natikálá te. . . Tokokaki ata kopesa bato bisika ya kofanda te. Tozuaki bitando ya foire ná nyonso wana, elingaki kokoka kuna na ngonga ya misato, mpo na kotondisa esika yango. Basengelaki kokanga bikuke, balingaki lisusu kotika te bákota. Bisó tokokaki kokóma kuna te kino na ngonga ya nsambo nsima ya zángá. Bomoni? Bato nkóto na nkóto bazalaki kouta bipai na bipai. Kaka. . .

<sup>2</sup> Mpe nazuaki bampokwa mitano ya nsuka na liyangani oyo ya nsuka, mpe natongaki zinga-zinga na Liloba, nabandi kosósola nguya nini Liloba ezalaka na yango. Bomoni? Mpamba te, Liloba ezali Nzambe. Bomoni? “Na ebandeli Liloba ezalaki, Liloba ezalaki elongo na Nzambe, mpe Liloba ezalaki Nzambe. Mpe Liloba ekómaki mosuni mpe efandaki katikati na biso.”

<sup>3</sup> Sikawa, Baebele 4 elobi yango, ete: “Liloba na Nzambe ezali na mopotu koleka mopanga ya mino mibale.” Bomoni? “Liloba na Nzambe ezalaka na mopotu koleka, ekótaka na bozindo mpe ekabolaka mokuwa, mpe ekátaka, mpe esósolaka makanisi ya molimo, ya motema.” Bomoni? Yango wana nde, Liloba na Nzambe.

<sup>4</sup> Na bongo, soki likabo moko ezali, epai wapi tokoki komipemisa na yango; mpe Liloba, Yango moko, yango ezali Klisto, Oyo azali Liloba, ayaka kati na biso, mpe asósolaka makanisi ya molimo, ndenge bomonaka yango. Bomoni? Kitoko mingi mpenza. Na bongo, komona makambo oyo Asalaki mpe lolenge oyo Apambolaki biso! Na nsima. . .

<sup>5</sup> Wana, namiyoki bongo, kotongáká makambo zinga-zinga na Liloba wana na mpokwa minei, natikaki bato báfanda kimia, mpe bápéma, mpe Molimo Mosanto azalaki kobenga bato mpe kosala makambo na kati ya eyanganelo.

<sup>6</sup> Na nsima, na mpokwa ya nsuka, mokolo ya Lomongo eleki nsima ya nzánga, namónaki moko na milongo ya lobiko na nzoto ya nkembo koleka nyonso oyo natikálá komóna na Amerika. Bomoni? Bazalaki. . . Natindaki Billy kuna ná bakálati mokama, Gene ná mokama, mpe Leo ná mokama, mpe Roy ná mokama, bakabolaki ba-kálati nyonso, pene na nkama mitano. Bongo, nsima na bango komóna Liloba kozua esika, ná makambo oyo Yango ezalaki kosala, bongo nakóbaki kokangama na Liloba yango, mpe nabéngisaki bango

na etumbelo. Namonaki mibali ná basi kobwaka banzete na bango ya bibosono, mpe bongo na bongo, mpe kobikisama liboso kutu bákóma na etumbelo, kaka komona yango. Bomoni? Liloba na Nzambe esilaki kobima, na esika nyonso wana, mpe Emifandisaki na kati ya Mateya mitano wana, to Mateya minei, na mitema na bango, na lolenge ete bandimaki Yango na motema mobimba. Na bongo, eloko bobele moko oyo basengelaki kosala ezali ete bákutana mwa moke ná eloko moko to mosusu, bomoni, mpe ezalaki likambo ya solo-solo. Mpe kaka ntango bazalaki kokóma na etumbelo wana, bazalaki kobika kaka wana na etumb- . . . liboso báleka na etumbelo.

7 Nandimi, bandeko oyo bozali awa, ete bino nyonso boyebi Ndeko Ed, Ndeko Ed Hooper. Boye te? Bouti kuna, na Arkansas? Akutanaki na . . . Azalaki elongo na ngai na ebandeli mpenza ya lotómo na ngai. Alobaki: “Oyo ezalaki lokola bantango ya kala,” alobaki, “ndenge bazaláká kosala, eleki mibu ebele.”

8 Mpe bato mosusu bazalaki na ba-tumeur oyo ekómaki—ekómaki *boye*, bazalaki kozonga, babikisami. Bakúfi miso, bakúfá matoi, ba-bába, Nkolo na biso asalaki makambo ya ndenge na ndenge. Totikálá ata kozala na ntina ya komama bato te. Liloba oyo ezalaki kobima nde ezalaki kosala yango.

9 Na bongo Nkolo apesaki ngai Nsango oyo nakolinga koloba na losambo, na ntango moko, ntango nakozonga, mpe nazui mwa ntango. Nazali mpenza na makambo mingi ya kosala. Sikawa, nasengeli lisusu kokende, lobi, nazali kozela ete elenge mwasi yango áya. Mpe liboso kutu nákotisa sanduku-ya-mobembo na ngai na ndako, moto moko azalaki wana. Mpe nafandi mpenza mpenza naino te, kobanda wana. Bomoni? Nasololi kutu naino te ná libota na ngai uta nayáki. Bomoni? Mpe ezali—ezali mpenza mpasi. Mpe nasengeli kosénga mabondeli na bino nyonso, mpo na ngai mpe, ete Nkolo ásungá ngai koyika mpiko.

10 Sikawa . . . [Maloba mazángi na bande—Mok.] Namoni ndeko na biso oyo, azali kobela makasi mpenza, aláli na mbeto ya babeli oyo. Mpe biso . . .

11 Moto moko azali koya kozua biso, kala mingi te, mpo tókende na Louisville. Nalingi ete bókanisa mpe, na mabondeli, elenge mwasi moko malamú, oyo azali bobele na mibu pene na zomi na mwambe. Azali lipasa, mpe elenge mwasi Moklisto na eteyelo. Bilenge basi mosusu basololaka na ntina na ye, boyebi, na ntina na bilenge basi mibale wana, mpe bazalaki koloba na bango ete bazaláká kozángá makambo mingi na bomoi na bango, mpe basengélaki kobika lokola bilenge basi nyonso. Mwana mwasi moko azalaki na makoki ya kokipe makambo yango te. Oyo mosusu akomaki na zunguluké, mpe amiyokaki mpenza mabe mingi mpo na yango, mpe akóbaki kotangwa, kozonga nsima moke moke, mpe azali komitungisa mpo na yango. Sukasuka makanisi ebulungani ye. Mpe bango . . . Azali na ndako ya bato

ya libóma. Mama ná tata na ye bazali koya, kala mingi te, uta na Crandall, na Indiana, mpo na kokende na lopitalo yango, esika oyo bakomeka kotinda ye, na Madison, lobi.

<sup>12</sup> Sikawa, e—elenge mwasi yango, na nzoto boye, elenge mwasi yango azali na mpasi moko te. Ye. . . Eloko moko te, na nzoto. Azali mpenza na nzoto kolongonu. Kasi ezali mpasi mingi mpo na kolimbola yango. Mpe ekoki mpenza kolimbolama te. Likambo ezali ete, molimo na ye ezali kotelengana. Bomoni? Sikawa, o—osengeli kokanga molimo na ye mpe kozongisa yango na esika na yango. Bomoni? Ezali na. . .

<sup>13</sup> Kútu, toúti kolobela awa, eleki mwa ba—mpóso, na ndenge oyo nzoto ya moto esalaka. Ete ezalaka na biyokeli mitano mpo na kokota na nzoto, na bongo tokoki kobenga yango banzela mitano. Banzela mitano, ezali li—lisosoli, mabánzo, mpe bongo na bongo, mpo na kokóta na elimo. Na nsima, soki okóti na molimo, nzela ezalaka bobele moko, mpe yango ezali na nzela na bonsómi ya kopona, yango ezali na moboko moko wana, ndenge moto akelámá.

<sup>14</sup> Okoki koyamba Yango, to okoki koboya Yango. Okoki koyamba Klisto lokola Mobikisi, to koboya Ye. Mpe bozali kaka pembeni na Nzete yango, moko ya Bomoi mpe mosusu ya kufa. Moto nyonso azalaka liboso na Nzete yango, soki te, Nzambe alingaki kozánga kozala sémbó kotia moko kuna, na nsima kopona kopesa na oyo mosusu libaku ndenge moko ya—ya kopona malamau to mabe. Moko na moko na biso azali na libaku yango.

<sup>15</sup> Lisusu, na yango, molimo, tokoki kobikisama na nzoto, to tokoki kozánga kobikisama na nzoto. Sikawa, ezali te ete lokola ezangi. . . ete lokola tobikisami na nzoto te kokokana na Nzambe. Bisó tozali na yango. Mpamba te boyokani yango ezangi esengeli. Mpe Asilá kosómba lobiko na biso ya nzoto. Na yango, lobiko na biso ya nzoto ezali—ezali ya biso. Ezali ya biso. Sikawa, ezali kotala soki tokolanda nzela *oyo*, kondima yango; to nzela *oyo*, kozanga kaka kondima yango. Sikawa, yango nde nzela bobele moko tokoki kokota na Bozali na Nzambe.

<sup>16</sup> Sikawa, mwana kitoko oyo, mama na ye azali moninga. Ngai, na ngai. . . Oh, azaláká moko na baninga na ngai ya basi. Azalaki elenge mwasi moko malamau, akólaki na ndako ya ba-Nazaréen ya makambo makasi, elenge mwasi moko ya boboto. Mpe azali na mobali moko malamau. Ye mpe nayebi ye, elenge mobali moko malamau mpenza, oyo abálá ye. Mpe azalaki kaka mwa. . . Bazali kobókola bana yango mpo na kosalela Nkolo, mpe batiaki bango na kelasi. Mpe batelemaki mpenza ngwi kati na Klisto, mpo na kosala makambo ya mabe te. Kasi makambo ekómi bongo.

<sup>17</sup> Azali kaka kotungisama, kaka ndenge ngai. . . nauíti kotala, kala mingi te, mpe natalaki elenge mobali moko malamau, ye mpe alekaki na likambo yango moko, mpenza. Mpe na. . .

Tokendeki kuna na mpokwa moko, epai ya Ndeko Wright, mpe Orville azalaki mpenza na—na motungisi makasi. Mpe ye, boyebi, ntango azalaki koluka kobengana ngai na ndako; Orville ná ngai tozalaka mpenza baninga malamau, ya solo mpenza, nazalaki lokola tata na ye. Ngai moto nabalisaki tata ná mama na ye, elongo. Mpe azalaki kopumbwa mpe kogánga: “Bima awa! Bima awa! Bima awa!” Bomoni?

<sup>18</sup> Sikawa, oyo tosengelaki kosala kuna ezalaki kokota na ngámbo ya molimo mpe kokanga molimo ya elenge mobali yango. Bomoni? Mitungisi mingi ekómelaki mwa motema na ye. Azali elenge, kasi amonaki makambo mingi. Mpe tozóngisaki ye mbala moko epai asengelaki kozala. Bomoni? Nsima na mwa mikolo, akómaki—akómaki malamau.

<sup>19</sup> Sikawa, bosengeli kosala ndenge moko mpo na likambo oyo. Namonaki yango, mpe nayebi ete ezali solo. Kasi sikawa, kaka . . . Na—nasengi na bino nyonso bóbondela sikawa, ete—ete Nzambe ásungá ngai mpo námona elenge mwasi yango. Na esika moko, oyo ye ayebi esika azali te, mpe kozongisa ye na esika oyo ya ye. Nzela wana eyaka na nzela na kondima. Bomoni, akoki kozala na kondima mpo na ye moko te. Ayebi te esika nini azali, to eloko moko. Bomoni? E—esengeli na kondima na biso mpo na likambo yango.

<sup>20</sup> Sikawa, na yango, nguya wana ya lisekwa ya Klisto, nde Apesi biso libaku yango. Ezali epai oyo, yo, na lolenge moko boye, Liloba na Nzambe ekótaka na kati ya mosumuki. Mpe Esengeli kokende mosika koleka mateya ya Liloba oyo ebimaka. Yango wana nalingaki koloba mwa moke, na ntongo oyo, liboso tóbondela mpo na babeli. [Maloba mazangi na bande—Mok.]

<sup>21</sup> Bozali komikanisela, eleki ntango molai te, emononeli oyo Nkolo apesaki ngai, boyebi, na ntina na komona Ngámbo mosusu? Bozali komikanisela ntongo yango, ntango nazalaki kotatola na ntina na komona Ngámbo mosusu? Ee, ezalaki ya solo.

<sup>22</sup> Mpe zulunále *Mongongo* ya ba-Homme d’Affaires du Plein Évangile bakomaki likambo yango, mpe batiaki fotó moko awa, na nsima ya lokasa yango. Mpe babakisi mwa likambo moko awa na nsé, mwa eteni moko awa na nsé, kolobela na ntina na lotomo. Kútu, zulunále yango ekendeke na mokili mobimba, balimbolaka yango na nkóta mingi ya ndenge na ndenge. Mpe basálelaki lokasa ya liboso, oyo ya liboso, mpo na emononeli yango. Bomoni?

<sup>23</sup> Nazali na yango awa, mpe nakolinga ete bózua moko, mpo bókoká kotánga yango. Mpe koya . . . Nayebaki te bandeko boni balingaki koya, na ntongo oyo. Mpe bino, na bongo, soki esalemi ete ózanga kozua moko, ee, kende kaka na biró. Bazali na yango kuna na biró. Bapesaki biso nzela ya kozua mwa mingi, na ntina na “Kóba kokende liboso.” Bomoni? Mpe yango nde nyonso

oyo ezali na motema na ngai. Nyonso oyo nakoki koyoka, ezali: “Kóba kokende liboso.” Na ngámbo ya—ya ebale, ezali na Mboka mo—moko ya malamú koleka. Mpe tokoba kokende liboso kino tokóma na Mboka yango.

<sup>24</sup> Sikawa, nakanisi ete bakomí awa ete tokobulisa mwana ya Ndeko Stricker ná Ndeko mwasi Stricker. Boye yango . . .

<sup>25</sup> Bakómi boni sikawa, Ndeko mwasi Stricker? [Ndeko mwasi Stricker alobi: “Motoba.”—Mok.] Bana mike motoba. Wana ezali libota moko kitoko.

<sup>26</sup> Na bongo bazali . . . bazalaki ba-missionnaire na biso na—na Afrika, bauti kozonga, kala mingi te. Mpe bana na bango nyonso bazali bana mike kitoko. Mpe namoni ete mwana oyo mpe azali kitoko, bayei na ye na ntongo oyo mpo na mosala ya kobulisa bana.

<sup>27</sup> Teddy azali wapi? Teddy, okoki koya awa na piano, mwa moke, mwana? Mpe—mpe tóyemba loyembo na biso, mwa loyembo moko, boyebi, mwa loyembo yango, nabanzi, toyémbaka: *Bómema Bango*. Boye te? “Bómema bango longwa na bitando ya masumu.”

<sup>28</sup> Mpe ntina oyo tobétaka yango ezali mpo biso baboti, nyonso oyo tokoki kosala, ezali komema bango mpo na kobulisa bango. Tozali kobulisa bango epai na Nkolo mpe komema bango na kati, wana bazali naino ba-bebé, mpo bábunga te na kati ya elanga ya masumu. *Bómema Bango*. Tika tó . . . Oyebi yango, Teddy? Tóyemba bobele molongo moko na yango sikawa.

Bómema bango, bómema bango,  
Bómema bango longwa na elanga ya masumu;  
Bómema bango . . .

Soki mwana mosusu azali, ee, bóya na ye sikawa.

Bómema bana mike epai na Yesu.

Bómema bango, bómema bango,  
Bómema bango longwa na elanga ya masumu;  
Bómema bango, bómema bango,  
Bómema baoyo bazali kotelengana epai na  
Yesu.

<sup>29</sup> Ndeko Stricker ná Ndeko mwasi Stricker, namoni ete boyebi ntina ya loyembo yango, ya “komema bango,” ezali mposa oyo epelaka makasi na motema na yo, komeka komema baoyo babungi epai na Yesu. Bebé moke na bino, soki ákufaka liboso ábulisama, to eloko nini mosusu, asili kobikisama, ata bongo, mpamba te Makila na Yesu Klisto nde esalaki yango na Kalvari. Kási na ekaniseli ya mobembo ya nkembo oyo Asalaki na mokili, ntango Ye atielaki bana mike maboko mpe alobaki: “Bótika bango báya epai na Ngai,” yango wana bomemi mwana yango na ntongo oyo. Mpe botieli biso motema, ete tokoki kobóndela

libondeli ya kondima, mpo na mwana yango, mpo na kobulisa bomoi na ye epai na Nzambe.

<sup>30</sup> Nkombo na ye nani? [Tata alobi: “Marilyn Madge Stricker.”—Mok.] Marilyn Madge, Marilyn Madge Stricker. Azali na mibu boni? [Mama alobi: “Sanza zomi na misato.”] Sanza zomi na misato. Abotami na Afrika, boye te? [“Iyo.”] Ee, tika ete, soki lobi moko ezali, tika ete mwana oyo ázala missionnaire kuna, na elanga oyo abotamaki na yango. Mpe a—azali mwana moko kitoko. Okoki koya, Ndeko Neville?

<sup>31</sup> Mpe, Marilyn. Oh! la la! Nasepelaka ntango nyonso na babebé. Bébé oyo azali kitoko mpenza, boye te? Nsango nini? Nsango nini? Togumba mitó. Nalingi ete bótiela ye maboko.

<sup>32</sup> Tata na biso na Likoló, tomemeli Yo bebé Marilyn Madge Stricker, mwana kitoko oyo abótami na elanga ya koteya, ntango etumba ezalaki kotoka ndóngó. Nabondeli ete Opambola mwana oyo. Na Biblia, bamemaki epai na Yo bana mike ya motindo oyo. Otielaki bango maboko mpe Opambolaki bango, Olobaki: “Bótika bana mike báya epai na Ngai, mpe bópekisa bango te; mpo Bokonzi ya Likoló ezali mpo na baoyo bazali lokola bango.”

<sup>33</sup> Mama ná tata na ye batii ye na maboko na biso, lelo. Bisó, na kondima, tobuti bibuteli, kuna, mpe totii ye na maboko na Yo, na kondima. Pambola bomoi na ye. Pesa ye bomoi molai, Nkolo. Tika ete ázala mwana na Nzambe. Tika ete ásalela Yo na bomoi na ye mobimba, eteni nyonso ya bomoto na ye, ázala mosali ya Klisto. Kokisa yango, Tata. Pambola tata ná mama na ye, bandeko na ye mike ya mibali ná ya basi. Tika ete bábokola ye mpe, mpe bázala libota moko ya nkembo mpo na mosala na Nzambe.

<sup>34</sup> Tata, topesi bebé Marilyn Madge epai na Yo, na Nkombo na Yesu Klisto, mpo na bomoi ya mosala. Pambola ye, ná tata na ye, ná mama na ye, ná balingami na ye. Mpe tika ete bábika bomoi molai, bomoi ya esengo na mosala na Yo. Na Nkombo na Yesu. Amen.

<sup>35</sup> Nzambe ápambola yo, Ndeko Stricker. Nzambe ápambola yo. Mapamboli likoló na elenge mwasi malamú.

Natondi yo, Teddy, mwana.

<sup>36</sup> Nalingaka bana mike. Bino mpe?

<sup>37</sup> Bato boni batikálá koyoka te emononeli oyo Nkolo apesaki ngai? Bótombola maboko, baoyo bayóká yango naino te. Ndeko Neville, ozali na mwa buku na yo wana, ntango mosusu, ntango mosusu okoki bobele kotángela bango yango awa, mpo na mwa ntango moke. Nabanzi ete yango . . . Kaka awa, soki olingi.

<sup>38</sup> [Ndeko Neville atáangi zulunále *Mongongo Ya Ba-Homme d’Affaires Du Plein Évangile* ya sanza ya mibale, ya mobu 1961—Mok.]

[Mokolo mosusu na ntongo, nazalaki kolala na mbeto. Nautaki kolamuka na mpongi, mpe natiaki maboko na nsima ya motó mpe nazalaki kopema, ná motó likoló ya coussin. Bongo nabandaki komituna soki ekozala ndenge nini na Ngámbo mosusu. Nasósolaki ete nasili koleka katikati ya bomoi na ngai, soki nasengeli kokóma mobangé lokola bandeko na biso, mpe nazalaki na mposa ya kosala mingi koleka mpo na Nkolo, liboso nátika bomoi oyo.]

[Nayokaki Mongongo moko koloba: “Obandi nde kobanda! Kóba kobunda! Kóba kotia molende!” Wana nazalaki komaniola maloba yango, nakanisaki ete nazalaki na ngai kobánza nde nayokaki Mongongo moko. Mongongo yango elobaki lisusu: “Kóba kobunda! Kóba kokende liboso! Kóba kokende liboso!” Nandimaki kaka te, nakanisaki ete ntango mosusu ngai moko nde nalobaki maloba yango. Natiaki bibebú na ngai katikati ya mino mpe natiaki loboko liboso ya monoko mpe nayokaki. Mongongo yango elobaki lisusu: “Kóba bobele kotia molende! Soki óyebaka bobele eloko oyo ezali na nsuka ya nzela!” Ezalaki lokola nazalaki koyoka miziki ná maloba ya loyembo moko ya kala, oyo nayebaki malamumu.]

[Nazali na mposa ya kozonga ndako mpe na mawa, mpe nalingi komona Yesu,]

[Nakosepela koyoka bangonga ya libóngo kobeta,]

[Ekongengisa mwa nzela na ngai mpe ekolongola kobánga nyonso,]

[Nkolo, tika nátala koleka ngámbo na ridó ya ntango.]

[Bongo Mongongo yango etúnaki: “Okosepela komona na ngámbo ya ridó yango?” Nayanolaki: “Ekosunga ngai mingi mpenza!”]

[Eloko oyo esalemaki, nayebi yango te. Soki nazalaki na kati to libanda ya nzoto, to soki ezalaki komemama, nayebi te, kasi ekesanaki na mamóno nyonso oyo nasilá kozua. Nakokaki komona esika oyo namemamáki mpe nakokaki komimona ndenge nalálaki na mbeto na ngai. Nalobaki: “Oyo ezali likambo moko ya ndenge!”]

[Ezalaki na motango monene ya bato, mpe bazalaki koya mbangu mpo na kopesa ngai mbote, kogángáká: “Oh, ndeko na biso ya motuya!” Liboso basi nde bayaki, bazalaki lokola na ebandeli ya mibu ntuku mibale, bazalaki koyamba ngai mpe koloba: “Ndeko na biso ya motuya!” Bilenge mibali bongengi ya bolenge, ná miso kongengáká lokola minzoto na butu ya molili makasi, ná mino na bango mpémbe lokola mayaka, bazalaki koyamba ngai mpe koloba: “Ndeko na biso ya motuya.”]

[Bongo namonaki ete ngai, mpe, nakomaki elenge. Namitalaki kuna, mpe nabalukaki mpe natalaki nzoto na ngai ya mobange elálaki na mbeto, maboko nsima ya motó na ngai. Nalobaki: “Nazosósola likambo oyo te!”]

[Wana ebandaki ngai koluka kosósola esika oyo nazalaki, nbandaki kosósola ete lobi eleki ezalaki te mpe lobi ekoya ezalaki te, kuna. Emonanaki lokola moto moko te azalaki kolemba. Ntango ebele ya bilenge basi, ya kitoko koleka basi nyonso oyo nasilá komóna, bazalaki koyamba ngai, namonaki ete bobele bolingo moko ya nkembo nde ezingaki ngai, mpe kobendama na nzoto ezalaki te, lokola na bizaleli ya bomoto. Namonaki ete bilenge basi yango nyonso bazalaki na suki milai kino na loketo, mpe bajípe na bango ekitaki kino na makolo.]

[Nsima na yango, Hope, mwasi na ngai ya liboso, ayambáki ngai, mpe alobaki: “Ndeko na ngai ya motuya!” Na nsima, elenge mwasi mosusu ayambaki ngai mpe Hope abalukaki mpe ayambaki elenge mwasi yango. Nalobaki: “Nazosósola likambo oyo te. Oyo ezali likambo moko na mobimba ya kokesana na bolingo na biso ya bato. Naboyi kozonga na nzoto ya mobange wana, oyo ezali na mbeto.”]

[Bongo Mongongo moko elobaki na ngai: “Oyo nde likambo oyo oteyaki, ete Molimo Mosanto azali! Oyo ezali bolingo ebongi be. Eloko moko te ekoki kokóta Awa kozángá yango!”]

[Na nsima, natombolamaki mpe nafándisamaki na esika moko ya likoló. Zinga-zinga na ngai nyonso, ezalaki na motango ebele ya mibali ná basi, na lómbé ya bolenge. Bazalaki kogángá ná esengo ete: “Oh, ndeko na biso ya motuya, tozali na esengo mingi ya komona yo awa!” Namilobelaki: “Nazali kolóta te, mpo nakoki komona bato oyo mpe nakoki komona nzoto na ngai oyo eláli na mbeto kuna na nsima.”]

[Mongongo yango elobaki na ngai: “Oyebi ete ekomámá na Biblia ete basakoli basangánáki ná bato na bango.” Nalobaki: “Iyo, namikaniseli yango na Makomi, kasi ba-Branham bazalaka ebele boye te.” Mongongo yango eyanolaki: “Baoyo bazali ba-Branham te. Baoyo bazali baoyo babongolaki motema na nzela na yo, baoyo yo okambáki epai ya Nkolo. Basi mosusu oyo ozali komona ete bazali bilenge mpe kitoko boye, bazalaki na mibu koleka ntuku libwa ntango okambáki bango epai ya Nkolo. Kokamwa te ndenge bazali koganga: ‘Ndeko na ngai ya motuya!’” Na bongo ebele na bato yango, bagángaki elongo: “Soki ókendeke koteya Nsango-malamu te, mbele biso tolingaki kozala awa te!”]



[Natunaki: “Oh, Yesu azali wapi? Nalingi komona Ye!” Bato yango bayanolaki: “Azali na mwa likoló koleka. Mokolo moko Akoya epai na yo. Otíndamaki lokola mokambi, mpe ntango Nzambe akoya, Akosambisa yo kokokana na malakisi na yo.” Natunaki: “Polo ná Petelo mpe basengeli koleka na kosambisama yango?” Eyano ezalaki: “Iyo!” Nalobaki: “Ngai nateyi makambo oyo bango bateyaki. Natangwé na Yango na ngámbo moko to mosusu te. Epai bango babátisaki na Nkombo na Yesu, ngai mpe nasalaki bongo; epai bango batéyaki Libatizi ya Molimo Mosanto, ngai mpe natéyaki bongo. Nyonso oyo bango batéyaki, ngai mpe natéyaki yango.”]

[“Toyebi yango,” bato yango bagángaki, “mpe toyebi ete tokozonga na mokili elongo ná yo na ntango moko. Yesu akoya kosambisa yo kokokana na Liloba oyo oteyaki biso. Na nsima, okotalisa biso epai na Ye, mpe, elongo, biso nyonso tokozonga na mabele mpo na kobika mpo na libela.” Natunaki: “Nasengeli nde kozonga na mokili, sikawa?” Bayanolaki: “Iyo, kasi kóba kokende liboso!”]

[Ntango nabandaki kolongwa na esika ya kitoko ná esengo wana, na mosika nyonso nakokaki komona na miso na ngai, bato bazalaki koya epai na ngai koyamba ngai, kogángáká: “Ndeko na ngai ya motuya!”]

[Na pwasa, nazongaki na mbeto yango lisusu. Nalobaki: “Oh, Nzambe, sungá ngai! Kotika ata moke te ete nákakola Liloba. Tika ete nákangama na Liloba. Etali ngai te oyo moto mosusu nani asali, Nkolo, tika ete nákoba kokende liboso kino na esika ya kitoko, ya esengo wana!”]

[Nandimisami koleka liboso na bomoi na ngai ete ekosengela na bolingo ebongi be mpo na kokota na esika yango. Zuwa ezalaki kuna te, bolembu te, bokono te, bobange te, liwa te. Bobele kitoko mpe esengo oyo eleki mpenza nyonso!]

[Nyonso oyo osálaka, tia makambo mosusu nyonso pembeni kino ózua bolingo oyo ebongi be! Kóma na esika oyo okoki kolinga moto nyonso, ata moyini nyonso. Ata mpepo ezali koningana, ata mikalikali ezali kopela-pela, to mandóki ya monguna etali ngambo na yo, makambo yango ezali na ntina te: zala na bolingo oyo ebongi be!]

[Soki obikisami te, yamba Yesu Klisto lokola Mobikisi na yo sikawa! Soki obatisami naino na mai te, zua libatizi sikawa! Soki ozui naino Libatizi ya Molimo Mosanto te, yamba yango sikawa! Kóba kopota mbangu kino na bolingo oyo ebongi be, yango nde ekomema yo na esika ya kitoko ná esengo wana, na ngámbo ya ridó na ntango!]

<sup>39</sup> Matondi, Ndeko, mpo na yango. Ezali . . . Nakanisaki ete ntango mosusu, bamosusu kati na bino bakozua libaku ya

kotángá yango. Mpe soki ozali na mwa buku yango te, boye, okoki kozua yango.

<sup>40</sup> Bongo, na nsuka ya lokasa yango, akomaki mwa eteni moko na ntina na lotómo kuna. Nayebi te soki bomónaki yango to te, kuna na nsé, soki osilisi kotángá yango. Kuna na nsé, mwa eteni moko na nsé. [Maloba mazangi na bande—Mok.]

<sup>41</sup> Sikawa, yango elímbolami mpenza na minoko nyonso, ya mokili oyo, bomoni, mpo—mpo étángama na mokili mobimba.

<sup>42</sup> Sikawa: “Eloko nini—eloko nini. . .” ee, okoloba, “mpo na nini olobi yango, Ndeko Branham, liboso óbondela mpo na babéli?”

<sup>43</sup> Ezali mpo na likambo oyo: mpo tókoka koyeba ete kosala makasi na biso ezali ya mpamba te. Bomoni? Tosengeli kobelema na Nzambe na nzela wana ya bolingo ná kondima. Kondima ememaka biso na nzela yango. Bolingo nde ekotisaka biso na kati. (Bolimbisa ngai.) [Maloba mazangi na eteni oyo ya bande—Mok.]

<sup>44</sup> Sikawa, bokanisi ete Nzambe ako. . . Sikawa tó. . . Sikawa, kondima na bino ekómaka na esika oyo sikawa, bokanisi ete. . . ? Bokokanisa nini sikawa, soki makasi nyonso oyo. . . tabernacle oyo ná lisanga ya bato oyo, awa, basalaka mpo na Bokonzi na Nzambe? Ezali na bato mingi awa oyo bakáti ndambo ya mbongo ya bilei ya bana, mpo na Bokonzi na Nzambe. Ezali na bato mingi awa oyo bazángi bilamba, mpo na Bokonzi na Nzambe. Ezali na bato mingi oyo batámbolaki na mituka na kati ya mipepe makasi, mpe batámbolaki makolo ngulu, mpo na kokóma na tabernacle awa, ezali solo, mpo na Bokonzi na Nzambe.

<sup>45</sup> Bokoki kobanza ete moyemi moko áyema liyemi moko ya motuya mpe kitoko mingi kino eleki kitoko mpenza, na nsima ápasola yango? Ekozala na likambo moko oyo ezali kotambola malamau te ná moyemi yango. Bokoki kobanza ete alángá-nzembo moko ákoma loyembo moko na lolenge ete eleki kitoko, na nsima ápasola lokasa ya—ya mizíki na ye? Ekozala ete eloko moko ezali kotambola malamau te ná alángá-nzembo yango. Bomoni? Mbeba moko te ezali ná Nzambe. Nzambe asálaka likambo ya boye te, kaka mpo na kopasola yango mpe kobwaka yango. Ezali mpo na Bokonzi na Ye. Ezali mpo na nkembo na Ye.

<sup>46</sup> Moko na moko na biso azali na eteni ya kosala kati na liyemi yango ná loyembo yango. Tozali biteni ya Bokonzi na Nzambe. Mpe ezali ete, tokoki kosala misala na biso, na ntango nyonso oyo toyebi esika na biso, esika yango ezali ya biso, na nsima tótíkala kaka wana, na esika yango. Mpe esika moko oyo toyebi, ezali kozala kati na bolingo, mpo yango nde esalaka liyemi mobimba.

<sup>47</sup> Sikawa, ezalaka mpasi, ntango omoni bimononeli oyo, lokola oyo boye, ná nyonso wana, mpo na kosósola eloko oyo ezali—oyo ezali na Ngámbo mosusu. Nakosepela koyeba yango. Moto yango akomaki mwa eteni oyo kuna na nsé, mpo na koloba

ete basakoli ya kala, bazalaki komona bimononeli, mpe bongo na bongo, mpe ndenge ete lelo, na ngámbo koleka kutu ete. . . Tokoki kosósola yango te, kasi Nkolo apesi biso nzela ya kokota kuna mpe komona oyo yango ezali.

<sup>48</sup> Sikawa, baninga, nalálaki mpongi te. Mpe ngai, bobele mpo na bino ná ngai, ná losambo oyo, nazalaki kati na emononeli te. Nayebi eloko nini emononeli ezali. Mosusu awa, kaka na mposo eleki, mosusu, esalemaki kino mbala ntuku misato, na mpokwa moko. Bokoki kobanza bozito oyo ezalaka likoló na moto. Ekomisaka yo motema likoló-likoló, ya solo mpenza.

<sup>49</sup> Bongo soki okendeki na liyangani moko ya ndenge wana, ná mokumba yango, soki liyangani yango elekaki malamau to te, ezali likambo na yo, kaka—kaka mokumba yango? Osengeli koyanola na motei moko na moko, na motuna moko na moko, na likambo moko na moko. Liyangani yango éleka malamau to te, mokumba yango ezali kaka likoló na yo moko. Tala eloko oyo yango ekosala yo.

<sup>50</sup> Mpe baninga na ngai mosusu na mosala, mosala na bango ezali kaka koteka ba-buku, mpe bongo na bongo, bakómaka motema likoló-likoló mpenza, na lolenge ete basengelaka kozonga na ndako, bomoni, kopema, kozanga koya na losambo na mpokwa wana. Oh! la la! Oh, ezalaka mpenza nsómo. Ndakisa mwasi ya mwana na ngai, elenge Moklisto moko kitoko, Loyce. Kaka—kaka na kokendéké na mayangani, kaka mpo. . . Na mpóso mwambe, to mpóso nsambo, ntango nyonso ndenge wana, asengelaki kolála na mbeto mokolo moko to mibale, bomoni, azalaki ata na mokumba moko te. Bomoni? Billy, kaka mpo na kokabola mwa ba-kálati ya mabondeli, kasi abukanaki nde kobukana.

<sup>51</sup> Kasi, bomoni, bozito yango mobimba ezalaka likoló na ngai. Nasengeli kotalela bino ete bóbondela mpo na ngai. Bomoni? Libanda na yango, balobaka ete—ete miníti ntuku mibale ya—ya koteya, na nsé ya mpémela, ekokani na ngonga mwambe ya mosala makasi, na nzoto na yo. Ngai natéyaka pene na ngonga mibale kino misato na mpokwa moko; mbala mosusu nateyaka mbala misato mokolo moko. Bomoni?

<sup>52</sup> Na bongo ndenge nini mpo na emononeli moko? Emononeli moko elembisaki Nkolo na biso Yesu. Ya solo. Biblia elobi ete mwasi moko asimbaki elamba na Ye, mpe elembisaki Ye. Ee, soki emononeli moko elembisaki Ye, Ye, Mwana na Nzambe; ebongo ngai, mosumuki oyo abiki na ngolu, bimononeli ntuku misato na mpokwa moko ekosala ndenge nini? Bomoni? Ezali. . . Soki totelemi mpe tokanisi, yango eleki bomoto nyonso. Nzoto ya moto ekoki koyikela yango mpiko te. Nalingaki kozala na ndako ya bato ya magbóma esika moko boye, kobetáká motó na bitutu. Bomoni? Ezalaka—ezalaka mpenza bolembu na lolenge

oyo okoki te . . . Ezalaka bolembu ya kati, bomoni, oyo esilisaka mpenza makasi nyonso.

<sup>53</sup> Sikawa, kasi, na boye, okotia molende na nini? Nakoki koloba boye. Namoni Ndeko mobali ná Ndeko mwasi Cox, kuna, Rodney ná mwasi na ye, ná ndeko mwasi, kuna na nsima, bauti kobóngola motema. Ezali na Mboka moko kuna esika moko boye, oyo soki esalemi ete ókoka kokanisa Yango na makanisi na yo mpe komona Yango, Ezali eloko ya nkembo koleka. Ezali mpenza na ntina molende nyonso oyo tosalaka. Bomoni?

<sup>54</sup> Sikawa, liboso tóbondela mpo na babeli, nakoki koloba boye:

<sup>55</sup> Elingaki kozala ndenge nini soki bebé moko, liboso ábotama, tózua ndakisa yango, bebé oyo afándi na libumu ya mama na ye, sánzá libwa mobimba oyo, soki mwa bebé yango akokaki kokanisa? Akoloba: “Boyebi nini? Bayebisi ngai ete nakomi pene ya kobótama. Ee, nakosala nini kuna na libanda? Nayebi esika mosusu te, bobele esika oyo nafandi awa. Nazuaka makasi na ngai uta na kati awa. Kasi nakosala ndenge nini mpo na kobika kuna na libanda? Bayebisi ngai ete moi moko engengaka kuna. Bayebisaki ngai ete kuna, bato batámbolaka-tambolaka. Kasi ngai nayebi esika mosusu te, bobele esika oyo awa. Oyo nde nyonso oyo ngai nayebi, awa na kati ya—na kati ya libumu ya mama na ngai. Awa nde esika batiáki ngai. Awa nde nyonso oyo ngai nayebi, awa na kati ya libumu oyo. Mpe bayebisi ngai ete kuna bitando ezali mingi mpenza!”

<sup>56</sup> Ee, bebé yango alingaki kobanga mingi mpenza, mpo na kobotama. Boye te? Alingaki kobanga mingi mpenza, mpamba te azali kokende na esika oyo ayebi eloko moko te na ntina na yango, oyo ezali malamú koleka, ezali mbala milió na milió, malamú koleka esika azalaki. Akoyeba likambo yango ata moke te, akoloba: “Ndenge nini, nakosala nini?” Akobanga mingi mpenza, kobótama, kasi biso baoyo tofandaka awa, ee, biso baoyo tozaláká kuna kalakala, tokolinga ata moke te kozonga kuna, tokolinga kozonga lisusu na libumu ya mama te. Bomoni? Te, tokolinga kosala yango te.

<sup>57</sup> Ezalaka mpe bongo ntango tokómaka pene na liwa, moninga. E Nzambe! Bomoni? Ozali kobotama na Esika moko. Okómá naino Kuna te. Okoki kososola Yango te, ndenge Ezali na nkembo. “Eko—ekozala ndenge nini Kuna na libanda? Ngai . . .” Mpe eloko bobele moko oyo esalaka ete náyeba yango, to óyeba yango, ezali mwa kosimbama wana ya Bomoi, lokola molimo oyo ekoti kati na bebé yango na libumu ya mama na ye. Bomoni? Yango nde lolenge bobele moko oyo tokoki kososola oyo Mboka ya nkembo wana ezali, ntango bokono ezali te, mawa te, liwa te, bobange te, eloko moko te. Oh! la la!

<sup>58</sup> Ee, ntango okokóma Kuna, okolinga lisusu ata moke te kozonga na esika ya boye, koleka te ndenge bebé akolinga kozóngá na libumu ya mama na ye. Bomoni? Makambo ezali

na nkembo mingi koleka na Ngámbo mosusu, bomoni, libanda Kuna. Tokoki kososola Yango te, ata moke te, tokoki te. Ee, kaka ndenge elekeli makanisi ya bebé wana, biso mpe elekeli lisosoli na biso, ndenge ekozala na libanda Kuna, bomoni, mpo tozali na kati ya libumu ya mabelé, tokómi pene ya kobotama na ntango moko, na Bokonzi ya sika, na Mokili ya sika.

<sup>59</sup> Mpe ezali lolenge wana nde namíyokaka na ntina na bimononeli yango ná makambo ya ndenge wana, to makambo nyonso oyo ekómelaki ngai mokolo wana, ntango nakátisaki na ngámbo, kaka na libanda, mpe namonaki makambo oyo Yango ezalaki, na nsima nazongaki awa na kati.

<sup>60</sup> Bokoki kobanza ete, soki ozalaki bebé mpe—mpe o—oyebaki ndenge ezalaka na nkembo, mpo na kotambola awa, komona banzete kobimisa ba-felele, bandeke koyemba, moi kongenga, mpe bomoi ya boye, bongo kosengela kofinama na kati ya libumu moko? Ee, okolinga ata moke te kozonga kuna.

<sup>61</sup> Ee, na bongo, biso, makanisi na—na biso ekokoka te, na ngambo oyo, to komeka kokanisa oyo yango ezali Kuna. Wana, Makomi elobi: “Liso emóná yango te, litoi eyóká yango te, to etíkálá mpe kokótá na motema ya moto, makambo oyo Nzambe abómbeli baoyo balingaka Ye.” Bomoni? Boye toyebi ete ekozala na nkembo, na Ngámbo mosusu. Mokolo moko, liwa, oyo tobengaka liwa, ekopesa biso Mbotama ya sika, mpe tokokóta na Mokili mosusu, na Ngámbo mosusu.

<sup>62</sup> Ndeko George, okozala mobange te, ebosono te, Kuna. Mpe Ndeko mobali ná Ndeko mwasi Spencer, ná bamosusu lokola biso baoyo tokóli, mpe bongo na bongo, kuna tokozala bilenge mpo na libela.

Oyo. . . nakotika elamba oyo ya mosuni, mpe nakomata

Mpe nakosimba motóle ya seko,

Mpe wana nakoleka na mipepe, nakogánga:

“Tíkala malamú, tíkala malamú, ngonga kitoko ya libondeli!”

<sup>63</sup> Na ntango yango, nyonso ekosila nye. Babutu milai ya mabondeli ekozala lisusu te. Tokokota na eloko wana ya bolenge, ya esengo mpo na kozala Kuna, kaka mibu moko te, to mibu ntuku mitano te, to mibu milió moko te, kasi ntango tokozala Kuna mibu milio na milio na milio na mokama, ekozala lokola tobandi naino ata kobanda te. Yango mpenza. Boye mpo na nini tozala na esengo te na ntongo oyo? Mpo na nini te kosepela? Mpo na nini tosengeli te kozua litomba ya makambo nyonso ya nkembo oyo Nzambe asili kopesa biso?

<sup>64</sup> Lobiko na nzoto uta na Nzambe yango oyo. Mpo na nini Yesu azokisamaki; mpo bópasola liyemi, mpe bóloba: “Eloko ya boye ezalaka na yango te”? Nzoto na Ye ezokisamaki kuna, mipanzi emonanaki, mpo “na mapipi na Ye biso tobikisamaki”. Tópasola

liyemi yango te, na ntongo oyo. Tóyamba nde Yango, tóndima Yango.

<sup>65</sup> Sikawa, ndeko mobali, ná bino nyonso sikawa baoyo tokobondela mpo na bino, soki bokoki koya kotelema pembeni na etumbelo. Wana nsango ebimaki, kala mingi te, na nzela na ndimbola mpe minoko na sika, ete tokotiá maboko na babéli mpe tokomona misala ya nguya ya Nzambe.

<sup>66</sup> Sikawa, ndeko na biso ya mobali, ozali na ntina ya kotelema te, ndeko, oyo alali kuna na mbeto ya babéli. Tokoya epai na yo.

<sup>67</sup> Kasi soki bamosusu bazali awa ya kobondela mpo na bango, baoyo balingi kotelema zinga-zinga na etumbelo, wana ngai ná ndeko tokobóndela mpe tokotiéla babéli maboko, bóya sikawa. Mpe bómikanisela, bóyamba liyemi yango: “Na mapipi na Ye biso tobíkisamaki.”

<sup>68</sup> “Nazososola yango te, Nkolo.” Na ntembe te, ezali bongo. Ozali naino na kati ya libumu ya mabelé.

<sup>69</sup> Kasi Ye nde abongisaki makambo yango. Mpe Akozua te. . . Mpo na nini Azokisamaki? Kaka mpo na kopasola liyemi yango, to kopasola lokasa ya loyembo yango mpe kobwaka yango? Te mesie. Anyókolamaki, azokisamaki, mpe makila na Ye etangaki, mpo biso tókoka kobikisama na bokono. Mpe na nzela yango, biso, “na mapípi na Ye, tobikisami,” moko na moko na biso. Sikawa, wana bozali koya kosangana zinga-zinga na etumbelo mpo na libondeli.

<sup>70</sup> Sikawa, na mayángani ebele ya kafu-kafu oyo awa ya kopalanganisa Nsango-malamu na Amerika, balobaka: “Bosengeli kosala likambo *oyo*, kosala *oyo wana*.”

<sup>71</sup> Ezali na eloko moko oyo nalingi kozalela yango sémbó ná yo, moninga na ngai. Ndenge oyo Nzambe abikisaka babéli, ezalaka na mobóko ya kosalela Ye mosala. Bomoni? Ezalaka na mobóko ya kosalela Ye mosala. Tosengeli koyamba lobiko na biso na mobóko, ete, tokosalela Ye nsima na biso kobikisama na bokono. Sikawa, Biblia elobaki: “Bóyambola masumu na bino, bamoko na bamosusu. Bóbondela bamoko mpo na bamosusu, mpo bókoka kobikisama na bokono.” Bomoni? Esalemaka na moboko ete, okosalela Nzambe. Mingi kati na bino awa, ntango mosusu, bozali pene na liwa, mpe bo—bosengeli kokufa soki likambo moko esalemi te. Na bongo nalingi ete, na motema na yo. . .

<sup>72</sup> Sikawa, tokoki kopakola yo mafuta, tokoki kobóndela mpo na yo, ngai ná mokengeli, kobóndela libondeli ya kondima, kosala nyonso oyo tokoki kosala, kasi ekosala yo eloko moko te, kino yo moko ókota na boyokani ná Klisto. Bomoni? Osengeli kokóta na boyokani wana, ete: “Ngai, Nkolo. . .”

<sup>73</sup> Namoni e—e—elenge mama moko kotambola kuna, sika-sikawa. Ayaki awa, kala mingi te, na ndako, ná eloko moko

lokola tumeur, to maláli ya Hodgkin. Azali Metodiste, na kondima. Nabanzi ete ezali bongo, boye te, ndeko mwasi? Azalaki na litútú moko ya monene na mopanzi. Sikawa ye wana ateleme, abiki.

<sup>74</sup> Namoni Ndeko mwasi Weaver ateleme awa, azalaki na bokono ya cancer moko ya mabe koleka nyonso oyo namóná na bomoi na ngai. Likambo ya liboso oyo natúnaki ye ezalaki soki akolinga kobatisama na Nkombo na Yesu Klisto mpe koyámbola masumu na ye. Ntango nakótisaki ye na mai oyo awa, nasengelaki kosimba ye; akóndaki mingi, maboko na ye ekómaki mike mpenza. Mpe abátisamaki na Nkombo na Yesu Klisto. Esálemi eleki mibu zomi, boye te, ndeko mwasi? [Ndeko mwasi Weaver alobi: “Te. Eleki mibu zomi na motoba.”—Mok.] Eleki mibu zomi na motoba. Mibu zomi na motoba ya bomoi oyo ebatelami, mpo amíngelaki koya na botósi. Na ntango oyo minganga ya malamú koleka na zinga-zinga awa. . .

<sup>75</sup> Ee, monganga na ye moko ayebisaki ngai. Ntango, nayebisaki ye—nayebisaki ye, nalobaki: “Abikisami.”

<sup>76</sup> Alobaki: “Oh, oh! Akokufa na cancer, nsima na mwa bampóso. Komitungisa mpo na yango te. Akokende. Nsima na mwa bampóso, akokende.” Mpe asilaki koyebisa ye ete atikalaki bobele na mokolo soko mokó na bomoi. Mpe tala ye oyo, lelo, nsima na mibu zomi na motoba, ateleme na etumbelo. Naloba lisusu nini koleka, esalémá mbala na mbala, mbala na mbala!

<sup>77</sup> Sikawa, Nzambe asalaka yango te mpo na moko na bana na Ye, bongo ázanga kosala yango mpo na bana misusu. Asalaka yango mpo na bana na Ye nyonso. “Moto nyonso oyo alingi, akoki koya.” Ezali. . . Bobengami epai na Ye. Sikawa: “Libondeli ya kondima ekobikisa mobeli.” Biblia nde elobaki bongo.

<sup>78</sup> Sikawa—sikawa, soki. . . eloko oyo nalingi ete bósala, ezali ete bóyambola mabe na bino epai na Nzambe, mpe bóloba: “Nkolo, bikisá ngai.” Soki botikálá kobongola motena te, bópesa mitema na bino epai na Klisto. Mpe soki botikálá kobatisáma te, na mai, na Nkombo na Yesu Klisto, liziba ya mai esili kobongisama. Bomoni?

<sup>79</sup> Mpe mama moke moko azalaki kofanda na ngámbo ya balabala awa; ntango mozangi kondima wana abóngolaki motema mpo na yango. Na ntango oyo mwasi yango alalaki. . . Bautaki kozongisa ye na ndako longwa na Silvercrest, azalaki na tuberculose, ákobundáká na liwa. Mpe ntango nakendeki kuna, mpe Nkolo autaki kopesa emononeli moko, ete: “Akobikisama.”

<sup>80</sup> Mpe akutanaki na ngai kuna, na ntango oyo elandaki, M. Andrews, mpe apámelaki ngai mpenza. Alobaki: “Elikia ya lokuta ndenge wana, epai na mwasi wana!”

<sup>81</sup> Nalobaki: “M. Andrews, ezali elikia ya lokuta te. Mwasi yango azali Moklisto. Mpe ntango akozua makoki, akoya kozua libatisi.”

<sup>82</sup> Alobaki: “Azobunda na liwa.” Alobaki: “Ngai...Ndenge nini bakoki kozongisa ye na ndako longwa na Silvercrest?”

<sup>83</sup> Nalobaki: “Misie, ozali kotala, ozali...Oyo yo ozali kotala, ozali kotala oyo monganga alobi. Ngai nazali kotala oyo Nzambe alobaki.” Bomoni?

<sup>84</sup> Sikawa, yango nde bokeseni, oyo yo ozali kotala. Bomoni? Soki otali oyo monganga alobi, na ntembe te okokufa. Kasi osengeli kotala oyo Nzambe alobaki. Okondima liloba ya nani?

<sup>85</sup> Bongo soki Abraham ándimaka likanisi ya monganga, na ntina naye ete akómaki na mibu mokama, kasi alingaki kobota mwana na nzela ya mwasi na ye ná mibu ntuku libwa? Alingaki kosala nini, na ntango wana? Bomoni? Ee, monganga alingaki koloba: “Moto yango abeli ligbóma.” Kasi Nzambe atángaki ye moyengebene, mpo andimelaki Nzambe. Bomoni? Sikawa, bino...

<sup>86</sup> Mpe mwasi yango atikalaki na bomoi. Atiolaki kobátisama na Nkombo na Yesu Klisto, mpo nakanisi ete azalaki Metodiste to Presbytérien. Abandaki kokóma na bokono makasi moke moke koleka. Mpe ayáki kozua Grace Weber, oyo azalaki kofanda, to, afandaka kuna kino lelo, mwana na ye ya mwasi, alátaki robe, mpe ayáki awa, mpe abátisamaki na Nkombo na Yesu Klisto, azalaki na fièvre, ná maláli ya matútú na lipeka mobimba mpe nyonso wana, azalaki na fièvre degré ntuku minei. Mpe abátisamaki awa, na Nkombo na Yesu Klisto. Afandaka kaka na ngámbo ya balabala awa. Ntango mosusu afandi awa sikawa. Natámbwisaki miso mpo nátala soki nakokaki komona ye, eleki miníti moke. Bomoni? Botosi, bomoni.

<sup>87</sup> Ezali kaka te likambo ya kokende bipai na bipai... Nakesenaka ná bandeko na biso mosusu, oyo batiáka maboko na bato na *oyo*, oyo *wana*, mpe oyo *mosusu* boye, mpe balobaka ete kondima moko ya kafu-kafu nde ekosala yango. Ezali bongo te. Osengeli kozala na kondima ya solosolo, ya makasi, ya Biblia, ya Molimo Mosanto. Bomoni? Soki te, ekoumela te. Eumelaka te.

<sup>88</sup> Yango wana nakoki kotonda Nkolo mpo Asungaka ngai kino lelo. Lo—lo—lobiko na nzoto oyo esalemaka ezalaka ya solosolo, mpo etongamaka mpenza-mpenza likoló na YANGO ELOBI NKOLO. Bomoni? Yango wana eumelaka.

<sup>89</sup> Sikawa—sikawa, lokola mwa eteyelo ya lomingo, nazalaki kozela mwa moke, kosolola na bino, kino bákoma na bisika na bango mpenza, mpo tókoka kofanda na kimia sikawa. Totikali kaka na miníti mibale to misato, tokobondela, tokobanda kobondela.

<sup>90</sup> Sikawa, nalingi ete moko na moko na bino áyambola na Nzambe mabe na ye, mpe álaka na Nzambe ete akosalela Ye mpe akosala nyonso oyo akoki kosala. Ngai ná mokengeli tokobondela, tokoya kotiéla bino maboko mpe, na ntembe te, bokobikisama, soki bondimi yango.



<sup>91</sup> Ndenge nini bato wana, oyo bazalaki kotambola na banzete ya bibosono, ná bakúfi matoi, ná ba-bába, ná bakúfi miso, Lomingo eleki na nsima ya nzanga, bakokaki komata na etumbelo, mpe kobwaka banzete na bango ya bibosono; komata na etumbelo, mpe miso na bango kofungwama, boyebi, ndenge wana? Bato nkama na nkama! Na lolenge ete, nalembaki mingi, basengelaki mpenza komema ngai longwa na esika yango, ngai natelemaki kaka, bango bazalaki koleka. Bomoni? Molongo yango ekokaki kotandama kobanda awa kino pene na Ecole Secondaire ya Jeffersonville, batandani na molongo, koya koleka na molongo. Nayebi te soki ezali na moko na baoyo balekaki na molongo, oyo azángaki kobikisama. Bomoni? Mpo bayaki na mobóko ya kondima ya Baklisto ya solo, ya solosolo, mpe bazalaki kondima. Bango . . . Esengeli kosalema.

Sikawa bógumba mitó, bino nyonso, bósunga ngai ete nábondela mpo na bango.

<sup>92</sup> Nkolo Yesu, na ntongo oyo, tomemeli Yo eyanganelo ya bato oyo batelemi awa, baoyo bazali kozela, bana oyo bazali na bokono, ná mpasi ná mitungisi. Bazali mosika koleka elikia moko, mingi kati na bango, Nkolo, minganga bakoki kosalisa bango te, koleka mingi mobali oyo aláli awa na mbeto ya babéli oyo. Ekozala to ngolu na Yo mpo na ye, to akotika mokili nsima na mwa mikolo. Na ntembe te, ntango mosusu bamosusu na baoyo batelemi awa na etumbelo, crise cardiaque ezali kozela bango, ná maláli, ná bampasi oyo ekoki kobuka-buka bango.

<sup>93</sup> Likambo oyo ekoki kobikisa bango ezali bobele moko, Tata, ezali, kokende mosika koleka biyokeli mitano ya nzoto oyo, esika oyo minganga bameki na bosembo nyonso, na ntembe te, mpo na kobikisa bomoi na bango; maláli, cancer, tuberculose, bokono ya motema. Ná bipasó, mpe ba-sonde ya ndenge na ndenge, mpe bisalelo, ná—ná—ná bankisi oyo ebundisaka mikolóbe, monguna azali kokóba kokota, mpo áboma bango.

<sup>94</sup> Mpe nandimi, Nkolo, ete natalisi bango likanisi na Yo. Mpe nayokaki mobali yango koloba minoko na sika na ntongo oyo, mpe kolimbola yango, eloko oyo ekosalema lelo. Bamosusu kati na bango bakoyamba yango, Nkolo, na ntembe te. Ya solo. Nandimi yango.

<sup>95</sup> Sikawa, ndenge ekomami na Biblia, ete Dawidi, elenge mobateli mpate, azalaki kobátela bampate ya tata na ye, kuna nsima na esobe. Mokolo moko nkósi moko eyaki mpe akangaki moko na bana-mpate ya tata na ye, mpe ekimaki ná yango. Elenge mobateli mpate yango, ná kondima, azalaki na eloko nini mpo na kobundisa nkosi yango? Azalaki na carabine ya mikolo oyo to bondóki te. Kasi azalaki na mwa bilingóngo, mpe alandaki nkosi yango. Abomaki nkosi yango, mpe azóngisaki mpate yango. Ngombólo moko eyaki kokanga mpate moko; alandaki ngombolo yango, oyo ekokaki koniata ye na mabelé.

Kasi akanisaki te na ntina na monene ya ngombólo, to makasi ya nkosi, to mbangu na yango, to ndenge azángaki makoki ná bilingóngo.

<sup>96</sup> Kasi ntango atelemaki liboso na Saulo mokonzi, alobaki: “Mosali na yo azalaki koleisa bampate ya tata na ye, nkosi moko eyaki mpe ekangaki mpate moko, mpe ekimaki. Nalandaki ye mpe nazóngisaki mpate yango.” Alobaki: “Bobele Nzambe moko oyo abikisaki ngai na loboko, to na manzaka ya ngombolo wana, to na míino ya nkosi wana, akoki mpe kozua mosúte ya Mofilistia oyo mpe kopesa ye na loboko na ngai.”

<sup>97</sup> Toyebi ndenge lisolo yango ekobaki, abomáki ye mpenza; abomáki moto oyo alekaki ye na monene mbala mingi mpenza koleka oyo ye azalaki, mpe azalaki mobundi. Ndenge ebulunganisaki Saulo, mokonzi monene wana, moto monene na nguya, ndenge elenge mobali yango akokaki kozala na kondima ya ndenge wana na bilingóngo. Te, ezalaki na bilingóngo te, kasi na Nzambe.

<sup>98</sup> Sikawa, Nkolo, baoyo batelemi zinga-zinga na etumbelo oyo, oyo alali awa na mbeto ya babéli oyo, bazali bampate ya Nzambe, bana-mpate, ndenge ezalaki epai na Ye. Nkosi moko ekangi bango, babéngi yango cancer, ngombolo moko, babengi yango tuberculose, maládi mosusu ekangi bango, eningisingisi bango, mpe ebuki-buki bango. Nkolo, na—naye kolanda bango, ná mwa bilingóngo moko oyo ebengami libondeli ya kondima. Ezali na yango monene te, kasi nayebi oyo yango esalaka. Mpe nayebi ete ezali kaka Nzambe yango moko. Nalandi bango, na ntongo oyo, mpo názongisa bango, Nkolo, na mpio ya matiti mobesu ya nzoto kolóngónu, pembeni na mai ya kimia nye, mpe mosika na yíkiyiki na bango, mpo bándimela Yo.

<sup>99</sup> Mpe nalandi bango, ná ebundeli oyo Opesaki mpo na kokota. “Libondeli ya kondima ekobikisa babéli, mpe Nzambe akotélemisa bango. Soki basalaki lisumu moko boye, ekolimbisamela bango.”

<sup>100</sup> Mpe, Tata, tokei sikawa kokutana ná monguna, kokutana ná nkosi yango, kokutana ná—ná zabolo na lolenge nyonso oyo azali kati na yango, oyo ebéngami cancer, tuberculose, maláli ya Hodgkin, bokono ya motema, ná maláli mosusu nyonso. Toyei koluka ye, mpe kozongisa lisusu mwana-mpate oyo na Ndako na Nzambe. Tokei na Nkombo na Yesu Klisto, mpo na kosalela bilingóngo oyo Opésá biso. Zalá elongo na biso, Tata, wana tozali kobélema na Yo na limemia nyonso sikawa, na Nkombo na Yesu.

<sup>101</sup> Nalingi ete bókoba kogumba motó. Tozali koya kopakola mafuta, mpe kotielá babeli maboko, mpe libondeli ya kondima ekobikisa babeli. Moklisto nyonso oyo azali awa, tia kondima na yo na molongo ya mabondeli oyo.

[Molongo ya mabondeli eumeli miníti misato na ndambo, maloba mingi ya Ndeko Branham ezali koyokana malamumu te—Mok.]

Na Nkombo na Yesu Klisto!

Na Nkombo na Yesu Klisto!

Nkombo na Yesu!

Nkombo na Yesu Klisto!

Nkombo na Yesu!

Tata, napámeli zabolo!...?...?

Na Nkombo na Yesu Klisto!

Na Nkombo na Yesu Klisto!...?...?

Na Nkombo na Yesu Klisto!

Yaka mpe ndima yango...?...mpe ekosalema!...?...?

Nkolo, Yo...?...?

Nzambe...?...?

<sup>102</sup> Nkolo, Ozali... Yo nde okomáki libaku malamumu yango. Ozali Ndeko mosikoli, Klisto!...?...Na Nkombo na Yesu Klisto!

<sup>103</sup> “Libondeli ya kondima ekobikisa babéli.” Nalingi ete Ósala yango mpo na mwasi oyo. Sálá ete ázonga mwasi ya nzoto kolongonu!...?...?

Nkombo na Yesu Klisto, nazóngisi ye!

Na Nkombo na Yesu Klisto, nazóngisi ye!...?...?

Na Nkombo na Yesu Klisto, nazóngisi ndeko na ngai ya mwasi.

Na Nkombo na Yesu Klisto, nazóngisi ndeko na ngai ya mobali!...?...?

Na Nkombo na Yesu Klisto!...?...?

Na Nkombo na Yesu Klisto!...?...?

Na Nkombo na Yesu Klisto!...?...?

Osálá yango te. Nkolo ápambola yo!

Nalandi ye, na ntongo oyo!...?...?

<sup>104</sup> Na Nkombo na Yesu Klisto, nazóngisi yo, na nzela na libondeli ya kondima, longwa na boómbo!...?...Tobakisi kondima na biso na oyo...?...?

Ndima kaka;

Wana togumbi mitó sikawa. Sikawa:

Ndima kaka, ndima kaka,

...ekoki kosalema, ndima kaka.

E Nkolo, nandimi, E Nkolo, nandimi,


Nyonso ekoki kosalema... .

Tótombola maboko sikawa.

. . . Nkolo, nandimi;  
 E Nkolo, nandimi; Nkolo, nandimi,  
 Nyonso ekoki kosalema, Nkolo, nandimi.

<sup>105</sup> Tata na biso na Likoló, baoyo bakokaki kotelema, batomboli maboko, ete basilaki koyamba yango. Ndeko oyo alálaki na mbeto ya babéli, atélemi, mpo na kotalisa ete asilaki koyamba lobiko na ye. Tondimi, Nkolo, ete bazali kozonga na kimia sikawa kino na mpio ya matiti mobesu, pembeni na mai ya kimia, mpo na komiyoka lisusu malamau, na Nkombo na Yesu. Topesi Yo matondi mpo na yango. Amen.

<sup>106</sup> Malamau, Ndeko Neville, nakofanda awa mpo náyoka yo koteya sikawa.

<sup>107</sup> [Na ebandeli ya liteya, Ndeko Branham alobelaki “mwa eteni moko” oyo Ndeko Thomas R. Nickel, mokomi ya zulunále Lolaka ya ba-Homme d’Affaires du Plein Évangile, akomaki na lokasa ya liboso ya likambo yango, oyo elobi boye: “NA OYO ETALI FOTÓ OYO EZALI NA LOKASA YA EBANDELI: Na Ntango ya Biblia, bato mosusu ya Nzambe bazalaki basakoli mpe bamóni. Kasi na Mikanda nyonso ya Búle, ata moko te kati na bango azalaki na lotomo ya monene koleka oyo ya William Branham, mosakoli mpe momóni ya Nzambe, oyo fotó na ye etiami na lokasa ya ebandeli ya zulunále oyo, ya Lolaka ya Bato ya Nsango-malamau Mobimba. Nzambe asálelaka Branham, na Nkombo na Yesu, mpo na kosekwisa bakufi!”—Mok.] 

61-0305 Na Ngámbo Ya Ridó Na Ntango  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)